

Rode Kruis lo parti condon pa Aids Task Force durante Carnaval

ORANJESTAD(AAN): -- Aids Task Force Aruba (Departamento di Salubridad Publico) lo distribui condonnan durante tur actividad durante periodo di Carnaval na publico en general.

Esaki lo bay via Rode Kruis y lo wordo acompaña pa informacion tambe tocante con pa usa e condon.

E accion di parti condon ta den cuadro di e accionnan cu Aids Task Force ta hiba pa preveni malesa aids den comunidad.

Aruba ta conta cu 293 hende cu ta seropositivo o cu ta sufrí di Aids y e aña aki a bin caba dos caso nobo acerca.

Aids Task Force a ripara cu den pasado tabata tin hopi hende cu ta contra partimento di condon y contra programanan tocante con pa bisti condon.

Lo parti no solamente riba dianan di actividad pero tambe riba e dianan prome cu paradanan di Carnaval na San Nicolas y Playa.

Durante fin di siman largo polis mester controla mas pisa

ORANJESTAD(AAN) E fin di siman aki lo bay ta uno largo pa motibo cu dialuna ta un dia nacional di fiesta, esta Dia di Libertador Betico Croes.

Lo bay tin diferente actividad di carnaval tur caminda y esaki lo pone cu mirando cu mayoria hende ta liber dialuna, cu lo bay tin hopi movencion riba careteranan di Aruba.

Actividadnan di fiesta lamentablemente na Aruba a para bira cu chofernan bon zeta di alcohol ta subi caminda publico y core bao di influencia y asina pone nan mes, nan famia y otronan den peligro.


Cuerpo Policial cu tur aña ta worde confronta cu e fenomeno negativo aki, mester bay actua cu man duro contra tur esnan cu ta core auto mientras cu nan ta bao di influencia pisa di alcohol.

Cu un bon control riba puntonan estrategico polis por evita cu chofernan burachi por sigui core riba caminda y asina kita posibel peligernan grandi for di caminda.

Alcohol y trafico no ta mezcla cu otro y ta di spera cu pueblo tambe coopera cu polis y baha man cu bebemento di alcohol y sigur p esnan cu mester core auto.

Tur esnan cu kier bay goza di dianan di fiesta ta worde conseha pa bay den grupo y percura pa semper esun cu ta maneha auto no ta bebe mes y cu asina tur hende por yega cas sano y salvo.

Ayeratardi: Alarma di candela na Diromi Take Away na Santa Cruz



ORANJESTAD (AAN): Ayeratardi den careda di 5'or alarma a ser bati pa Diromi Take Away cu ta na candela na Santa Cruz.

Mesora dos unidad di bombero a sali pa e lugar y na yegada ta bin resulta cu ya caba algun persona cu tabata den e negoshi a paga e candela caba.

Segun por a saca afor ta cu e lugar ta bende galiña a la

parilla y e cayente y e humadi e mashin ta sali pa un schoorsteen cu ta pasa door di e plafond y bay afor via e dak.

Mirando cu tin basta cayente ta sali for di e schoorsteen aki a haci cu waya di coriente cu tambe ta core den plafond a smelt cu consecuencia cu el a haya un corto circuito cu a pone cende un candela chikito cu a saca

un cantidad di huma mesora.

Algun persona cu tabata den e lugar ta dal drinks a bay den accion mesora y a cuminsa ta paga e candela door di subi trapi cu hose di awa y aparato di paga candela na man.

E bomberonan na nan yegada tur loke nan a haci tabata mira si tur cos ta bon y e coriente di e lugar a ser kita completo tambe.

CARNAVAL LABORAL!!

